

EDITORIAL

Hampakon han protesta an korapsyon han rehimen US-Marcos

Hadton nakalabay nga tuig, iginrakudako ni Marcos nga masobra 5,500 nga proyekto nga *flood control* an ginhuman han iya gubyrno komo kasolbaran ha hiluagan nga pagbaha. Kundi ha kaarawdan kahuman pira kabeses na naman nautro an mga grabe nga pagbaha, naghuhunaw hi Marcos ngan nagsering nga "maawod naman kamo" samtang nakatutdo ha mga kontraktor hini nga mga bilyun-bilyo kapiso nga proyekto ngan kakunsabo nira nga pulitiko.

Nagpapakamalimpyo hi Marcos, bisan kun hiya mismo an nag-andam ngan nakapirma ha badyet nga nag-alutaga hin tikadako nga pondo para ha mga gatasan nga *flood control* nga proyekto. Haros tunga katrilyon piso an iya igin-alutaga hini nga mga maanomaliya nga proyekto ha naglabay nga duha katuig, 60.7% nga mas dako tanding hadton 2022-2023. Sugad kan Marcos, naghuhunaw an mga magkakakunsabo ngan magkakaribal nga pulitiko. Ngatanan hira nagtutrutduay. Direkta man o diri, dabi ha mga anomaliya an mga senador ngan kongresista, mga upisyal han De-

partment of Public Works and Highways (DPWH), Department of Budget and Management, bisan an magkalain-lain nga ahensya han gubyrno ngan an Malacañang mismo.

Ha mga naglabay nga semana, nabuksas an mga grabe nga anomaliya hini nga mga proyekto nga damo an diri human, himubo an kalidad o waray man la matikangan bisan kun nahigawas na an pondo. Nabuksas an bilyun-bilyon kapiso nga ginkurakot han magkakakunsabo nga burukrata kapitalista ngan mga kontraktor.

Utro nga naagaw an atensyon han katawhan kun tiunan-o hira naghaha-

kin hin bilyun-bilyon kapiso tikang ha mga pampubliko nga proyekto, ha porma han suhol, hukip o komisyon. Hurob-hurob nga tubtub 60% han balor han usa nga proyekto iginbubursa han upisyal han reaksyunaryo nga gubyrno ha magkalain-lain nga bali-tang. Kabatasanan liwat nga nagtikang hadton panahon pa han diktadura nga Marcos, nga tubtub 10% hini nga mga proyekto ginhihigop tubtub ha pungkay han Malacañang, kabalyo han pabor ngan proteksyon han gubyrno.

An paglista ni Marcos han dagko nga kontraktor ha Pilipinas kapareho han *drug list* nga iginpaparayaw hadto ni Duterte, diri agud lanaton an mga *drug lord* nga nagpapaluyo han pamaligya han iligal nga droga, kundi agud paluhuron hira ha iya poder ngan baydan an iya proteksyon. An pagpuntirya yana ni Marcos ha pira nga kontraktor, mga pulitiko ngan korap nga upisyal, ipokrito nga panlimpyo han gubyrno, nga an tinuod nga katuyuanan payukbuon ini ngan mas mahugot nga kontrolon ngan monopolyon an kurakot ha estado.

Kinahanglan naton santupon nga damo ha mga proyekto nga *flood control*, nga an pinakadagko ginlalakipan han pagtindog han sementado nga pader ha ligid han mga salog (gin-



tatawag nga *embanking*), diri solusyon, kundi hinungdan pa ngani han mas grabe nga mga pagbaha. Imbes nga solbaron an mga hinungdan han paghamabaw han mga salog (paglubog han salog tungod ha pagtotroso, pagmimina, pagkukwari ngan iba pa nga operasyon nga mapanhibang ha bubkid), iginbabalhin la hini nga mga proyekto an pagbaha ha mas himubo nga mga lugar, ngan ginhihimo pa nga mas makusog ngan makahiribang an sagalwak han tubig.

An tinuod, waray kalabutan ha pagsolbar ha mga pagbaha ini nga dagko nga proyekto nga *flood control*. Ini la an pinakabag-o nga "paborito" ha mga proyekto nga pan-imprastruktura nga pangita han mga burukrata-kapitalista ngan nawotawo nga kontraktor. Nagtikang nga magdamo ini ha panahon ni Duterte (haros 14,000). Antes an mga proyekto nga *flood control*, "paborito" nira nga proyekto an mga haywey, *flyover*, tulay, erport, mga duongan ngan tarabukan. Dinhi ginmamalgastar an pondo han katawhan imbes nga iginpupuhunan ha produktibo nga mga sektor han agrikultura ngan manupaktura.

An tikadako nga pondo nga ginkakarag ha diri produktibo nga mga proyekto nga pan-imprastruktura kaparte han iginduduso nga prayoridad han

mga imperyalista nga ahensya ha pinansya, sugad han International Monetary Fund, World Bank, Asian Development Bank, Japan International Cooperation Agency ngan iba pa. Ilarum ni Marcos, mas naglobo an pondo para ha imprastruktura, tikang ₱2.5 katrilyon hadton 2022-2023 ngadto ₱3.07 katrilyon hadton 2024-2025, diin dako nga parte para tugbangan an langyaw nga pautang. Hi Marcos ngan an mga burukrata-kapitalista an nagseserbe nga ahente hini nga mga langyaw nga imperyalista nga bangko.

Hakog ha mga "proyekto nga pan-imprastruktura" an mga burukrata kapitalista tungod ha kapaspas nga makapaghakin hin dako nga karikuhan tikang hini. Lamot liwat hini an mga pasista nga upisyal han militar ngan han NTF-Elcac. Dako nga parte han pondo han katawhan an nakaalutaga ha pagtindog han mga panmilitar nga kampo ngan mga "pagpapahusay" hini, hasta na an bilyun-bilyon kapiso nga mga maanomaliya ngan waray pulos nga proyekto ilarum han ginngaranan nga "Barangay Development Program."

An korapsyon o pandambong ha pondo han katawhan batakan nga aspeto han burukrata kapitalismo. Naghahakin hin higante nga bahandi an

mga burukrata-kapitalista ngan ira mga kakunsabo gamit an poder han estado. Kakunsabo nira an dagko nga kumprador burgesya ngan agaron maytuna nga mga dinastiya ha pulitika, ngan gamit an mga armado nga pwersa han estado agud puypuyon an pag-ato han katawhan.

Katawhan an nagpapas-an ha korapsyon han mga burukrata-kapitalista, mga alipures ngan kakunsabo ha mga anomaliya ha gubyerno. Samtang nalutaw hira ha karikuhan, nalulumos naman an katawhan ha baha han kakurian ngan gutom. Samtang muryaw hira ha ira mga mansyon ngan komportable ha magarbo nga sarakyan, milyun-milyon nga kabras an nabubuhi ha kabaraka nga mahianod han narumpagas nga baha kada nauran.

Hilarum, grabe ngan makatadungan an kangalas han katawhan. Pinakagrabe an ira kangalas kan Marcos mismo nga numero uno nga mandarambong ha pondo han katawhan. An mga katitirok, pagpapahayag ngan gios-protesta ha naglabay nga mga adlaw nag-eespiho ha kangalas nga nasalwak ha ira dughan kontra kan Marcos ngan burukrata kapitalismo.

Guliat nira nga papagbatunon hi Marcos ngan mga alipures ngan kakunsabo ha pagpapariko ha poder. Pukaw nga waray mahitatabo ha mga imbestigasyon han kongreso man o Malacañang, tukma la nga padamuon ngan pahiluagon nira an ira mga protesta ha kalsada agud mahipakita ha magkalain-lain nga pamaagi an kangalas han hiluag nga masa han katawhan.

Kinahanglan pukawon, organisahon ngan pagiuson an katawhan agud atuhan ngan tapuson an matalumpiguson nga sistema nga bagakolonyal ngan bagapyudal, ngan an makaklase nga paghahadi han mga burukrata-kapitalista, dagko nga kumprador burgesya ngan agaron maytuna. An hingyap han katawhan para ha pankatilingban nga hustisya, tinuod nga demokrasya, ngan katalwasan makakab-ot la pinaagi han rebolusyonaryo nga armado nga pakig-away.

 Tuig LVI Ihap 17 Septyembre 7, 2025	
Igin-gagawas an Ang Bayan ha lenggwahe nga Pilipino, Bisaya, Iloko, Hiligaynon, Winaray ngan Ingles. Nakarawat an Ang Bayan han mga kontribusyon ha porma han mga artikulo ngan balita. Gin-aaghat liwat an mga mambarasa nga magpaabot hin mga suson ngan rekomendasyon ha ikauuswag han aton mantalaan.	
Gin-uunod Editorial: Hampakon han protesta an korapsyon han rehimen US-Marcos 1 Mga ambus han BHB ha Bicol ngan Negros, daug Marcos, mga korap nga kontratista, ginpapagbaton 3 Mga protesta 3 Tsapter han PKM, nahitukod ha Negros 4 4 nga aktibista ngan parag-uma, iligal nga gin-aresto 5 Pakigbisog han trabahador 5 Pagpasulong han kabatan-unan nga Pilipino 6 Pagbabase han tropa nga Australian ha Pilipinas 7 Pagmimina ha Nueva Vizcaya ngan Benguet 7 Pagsaludar ha mga Martir han Agosto han Panay 7 Ha dagmit nga pulong 8 Ekspansyon han komersyal nga plantasyon 9 Rehimeng Prabowo, gintapo han protesta 10	
An Ang Bayan igin-gagawas duha kabeses kada bulan han Komite Sentral han Partido Komunista ng Pilipinas	
 ang.bayan@cpp.ph	

Mga ambus han BHB ha Bicol ngan Negros, daug

GIN-AMBUS HAN USA nga yunit han Bagong Hukbong Bayan (BHB)-Albay (Santos Binamera Command) an nag-ooperasyon nga 16-katawo nga iskwad han 49th IB hadton Agosto 21 ha Barangay Palapas, Ligao City, Albay. Diri mamenos ha tulo nga pasista nga sundalo an napatay ngan usa pa an nahi-report nga nasamaran ha ambus.

Sigon ha report han BHB-Albay, nag-aatentar an mga tropa han 49th IB nga dumuok ha ginbabasehan han hukbo han katawhan agud ireyd an yunit. Sering hini, nabantayan han masa an gios han pasista nga mga tropa sanglit dagmit nga nakahimo hin mapagdesisyon nga pitad an yunit han hukbo agud atakihon ini.

Ha Negros Occidental, gin-ambus han BHB-South Central Negros (Romeo Nanta Command) an tropa han 94th IB ngan CAGU nga nag-oopera-syon ha Sityo Balao, Barangay Tan-awan, Kabankalan City hadton Sept-yembre 4. Tulo an nasamaran ha mga pasista nga sundalo.

Aktibo nga depensa. Ha Aurora, usa nga sundalo han 91st IB an nasa-maran ha aktibo nga pagdepensa han usa nga yunit han BHB-Aurora (Domingo Erlano Command) hadton Agosto 21 han kulop ha Sityo Aguses, Bara-ngay Matawe, Dingalan. Tulo kabulan na an *focused and sustained military operations* han 91st IB ha Dingalan ngan kasapit hini nga mga bungto.

Ha naglabay nga mga semana, susrunod an nahireport nga mga armado nga aksyon ngan aktibo nga depensa han mga yunit han BHB kontra ha naa-take nga tropa han Armed Forces of the Philippines. Labot ha Albay ngan Aurora, nahilista ini ha Masbate, Oriental Mindoro, Quezon, ngan Capiz.

Ginpapahimuwaan hini nga mga serye han agway an pahayag ni Ferdinand Marcos Jr hadton Hulyo nga "waray na gerilya nga grupo" ha nasud.

Marcos, mga korap nga kontratista, ginpapagbaton han katawhan

SUSRUNOD NGA protesta an iginlansar han mga progresibo nga grupo kontra ha rehimen Marcos ngan mga kontratista nga dabi ha korapsyon ngan anomaliya ha mga proyekto nga *flood control* ngan iba pa nga imprastruktura. Iginhimo an mga paggios hadton Septyembre 4 ngan Septyembre 5 ha pangunguna han Bayan. Nagkamayda naman hin dalagan kontra ha korap-syon ha University of the Philippines-Diliman hadton Septyembre 7 nga gin-partisiparan han masobra 1,000 katawo.

Ginkadto ngan ginprotestahan han mga grupo nga pankalibungan ngan biktima han mga kalamidad hadton Septyembre 4 an upisina ha Pasig City han St. Gerrard Construction, pananag-iya han mga Discaya, nga usa ha mga kontratista nga dabi ha korapsyon labina ha dunot nga mga proyekto nga *flood control*. Ginlabugan nira hin lagay an *logo* ngan geyt han kompani-ya komo ginpapapakita han ira kangalas.

Ha pareho nga adlaw, ginkadto han mga membro han Anakbayan an nasyunal nga upisina han DPWH ha Manila. Kadungan hini an protesta han grupo nga KYUSI 4 Truth and Accountability ha Quezon City ngan han Ba-yan-National Capital Region ngan ONE Taft ha Pedro Gil. Ha Marikina City, nagprotesta an mga kababayin-an ha pangunguna han Gabriela Women's Party.

Hadton Septyembre 5, nagtirig-ob an mga grupo ha pagprotesta ha House of Representatives ha Quezon City agud kundenahon an DPWH ngan hi Marcos. Igintuman nira an paggios ha pagbista para ha badyet han depar-tamento. Usa nga protesta liwat an ginpangunahan han Bayan-Central Visa-yas ha DPWH Region 7 ha Cebu City. Ha Pampanga ngan Bulacan, nagpro-testa an Bayan-Central Luzon ha naglabay nga semana.



Abusado nga warden ha prisu-han ha Negros, gintanggal. Napa-tanggal hadton Agosto 28 an abu-sado nga warden nga hi Atty. Crisyrel P. Awe han Negros Occi-dental District Jail-Male Dormitory kahuman an 4-kaadlaw nga protes-ta han mayda 600 nga priso, kau-pod an mga priso pulitikal. Baton nira an paggios ha luun-luon nga mga kaso han pagtalapas ha ira ka-tungod ha sakob han prisuhan ha pangunguna ni Awe. Kalakip ha mga basaranan han pagpapaliwan kan Awe an mga kaso nga pan-gi-gipit ngan panarhug ha mga lider han priso, diri pagtuman ha nahiu-na nga mga kasarabutan ngan iba nga diri-makatudungan nga siste-ma. Nagpiket liwat ha gawas han prisuhan an mga pamilya han priso komo suporta.

Iglutaw an mga desaparesido. Nagprotesta ha Manila an Desapa-recidos Philippines ngan mga grupo ha tawhanon nga katungod hadton Agosto 30 komo paghandum ha In-ternational Day of the Disappeared. Panawagan nira nga iglutaw an ngatanan nga mga ginsikmit ngan piniritay nga ginpawara han mga pwersa han estado han Pilipinas. Ilarum han rehimen Marcos, diri mamenos ha 15 an biktima han pi-niritay nga pagpawara. Naglansar hin kapareho nga mga protesta ha syudad han Baguio, Iloilo, ngan Ce-bu, ngan ha Los Baños ha Laguna.

Mga migrante ha US, nagkauru-sa. Aada ha 850 nga migrante ha US, kaupod an mga Pilipino, an nagprotesta ha Tacoma, Washing-ton agud ipanawagan an pagpaun-dang ha diri makatawo nga pagtra-tar ha mga nakapriso ha mga pasili-dad han ICE, paglanat ha mga mig-rante ngan diri makatadungan nga deportasyon. Iginhimo an paggios kahuman iglansar an kumperensya nga nag-urusa ha 100 nga organisa-syon tikang ha US ngan ha iba nga nasud ha Defend Migrants Alli-ance.

Koresponsal:

Tsapter han PKM, nahitukod ha butnga han operasyon militar ha Negros


Determinado an Partido, Bagong Hukbong Bayan ngan bug-os nga rebolusyunaryo nga kagiusan ha Negros nga padig-unon an base panmasa ha lugpop hini. Iginhahatag nira an bug-os nga kusog, kaisog ngan kawaray pag-ruhaduha ha pagpapatuman han buruhaton masa ha giya han kagiusan nga pagtututul-id atubangan han waray hunong nga operasyon militar ha prente gerilya.

Ha haros bug-os nga bulan han Agosto, ginpapintas ngan ginpahilug han AFP ngan SAF-PNP an operasyon militar ha kabukiran han usa nga prente ha Negros. Igindeploy dinhi an masobra 600-700 nga pwersa ha 32 kakolum (9-12 nga elemento) han pasista nga tropa tikang ha lima nga batalyon han militar ngan usa nga batalyon han pulis.

Nakabantay naman an mga elemento han CAFGU ha mga detatsment ngan *patrol base* ingkaso may mahitabo nga agway giutan han militar ngan mga yunit han BHB.

Katuyuanan han madakmol nga presensya han kaaway an lanaton an base panmasa, palibutan ngan rumkon an mga yunit han hukbo han katawahan ngan bug-os nga rebolusyunaryo nga kagiusan ha lugpop han prente gerilya.

Gamit han AFP ngan PNP an mga nagsurender nga traydor ha masa ngan rebolusyon. Nagserbe hira nga mga giya agud magsulaysukay ha lugar, magsabrag hin ngirhat ngan piniritay nga magpasurender ha mga sibilyan. Naupod hira ha mga sundalo ha paniniktik, pagkuha han ritrato ha mga balay ngan indibidwal nga gintatahapan nira nga mga tagasuporta han BHB ha tahub han mga kunuhay sensus. Samtang nagsusulaysukay an mga ahente ngan sundalo ha mga komunidad, mayda mga sundalo nga nakapusisyon ha higtaas ngan estratehiko nga tereyn. Nagseserbe hira nga *blocking force* ha mga ganghaan ha butnga ngan dalan tipakadto ha kasapit nga baryo.



Pagpapadig-on ha base panmasa

Ha butnga hini, utro nga igintukod an mga hul-os nga asosasyon masa ha Marcia, usa ha mga baryo nga lugpop han pankabug-usan nga operasyon militar. Mayoriya ha mga residente dinhi tikang ha bataan nga klase. Kadak-an ha ira saop han agaron maytuna nga diri naukoy ha barangay.

Makuri an kinabuhi han mga parag-uma ha Marcia. Biktima hira han pyudal ngan bagapyudal nga paniniyupi. Tinulo an bahinay ha ira produkto. Ha mga sinuhulan, ₱300 an inadlaw ngan ₱500 naman ha pakyaw nga sistema han trabaho. Mas landaw dinhi an pakyaw nga pamamaagi ha pagtrabaho tanding ha inadlaw. Agud madugngan an kita, nag-aataman han mga hayop nga pambaligya an mga parag-uma.

Hirani ha baryo an mga detatsment han CAFGU ngan *patrol base* han AFP. Ha nakalabay nga mga tuig, nahiagum hin grabe nga militarisasyon an baryo diin makarimadima an mga panmilitar nga abuso ngan krimen ha gerra han mga sundalo.

Atubangan hini, mahugot nga nagkakaurusa an mga residente han Marcia agud ungbawan an ginkakaatubang nira nga mga problema ha ekonomiya, pulitika, kultura ngan militar. Gatus-gatos nga pamilya, nga may masobra 2,000 nga indibidwal, an nahisasakob ha mga tsapter han Pambansang Katipunan ng mga

Magbubukid (PKM), Makibaka ngan Kabataang Makabayan (KM). Haros usa kaplatun han milisya han katawahan an napagios ha depensa, mga tim han yunit nga pandepensa ha baryo ha kada sityo ngan may sanga han Partido ha lokalidad nga namumuno ha baryo.

Pagtutukod han tsapter

Iginlansar diri pala maiha an asembleya agud utro nga tukuron an tsapter han PKM ha baryo. Ginabrihan an aktibidad ha oryentasyon ha seguridad. Gindayaw han kumander han hukbo an kaisog han masa nga nagduso nga igpadayon an masmiting ha luyo nga tulo kakilometro la tikang ha ira pwesto an nag-ooperasyon nga militar.

Ha masmiting, sistematiko nira nga ginhisgutan, ha pangunguna han instruktur ha pulitika han hukbo, an nakaandam nga mga dokumento han pagsusuma han paggios ha lugar, kasaysayan, urhi nga resulta han pankatilingban nga imbestigasyon, suhetibo nga sitwasyon, istruktura ngan katungdanan, 1-katuig nga Programa ngan mga palisiya han rebolusyunaryo nga organisasyon masa ha baryo. Nagduon hira ha rebolusyunaryo nga kasaysayan han baryo. Linandaw an diskusyon ha bubligay han bug-os nga kagiusan tikang pa dekada 1960 ha panahon han

Sundan ha paypay 5

4 nga aktibista ngan parag-uma, iligal nga gin-aresto

Tulo nga kaso han pangaresto, usa nga kaso han waray wantas nga panmomba ngan mga kaso han sarbeylans ngan pan-gigipit an nahireport nga mga pagtalapas ha tawhanon nga katungod hadin nakalabay nga duha kasemana.

Ha Southern Leyte, gin-aresto han mga pwersa han estado an 61-an-yos nga hi Felixberto Consad, membro han Piston ha Butuan City, ha iya balay ha Sogod hadton Agosto 14. Ginkasuhan hiya han kaso nga pagpatay ngan gindara ha Sogod Police Station. Nag-uukoy hi Consod ha Southern Leyte agud likyan an pan-gigipit han militar.

Ha Rizal, duha nga residente han Sityo Rawang, Barangay Tandang Kutyo, Tanay an gin-aresto hadton Agosto 29. Gin-aresto an mga biktima tungod ha ira pagtindog, kaupod an komunidad, ha panlulupot han tuna han pamilya Chua-Tan ngan Sta. Lucia Corporation ha erya.

Ha Camarines Norte, gindakop han mga sundalo han 16th IB hi Faye Tal-low, usa nga organisador han mga parag-uma, ha Barangay Malibago, Labo hadton Septyembre 4. Ginreyd han militar an balay nga gin-uukyan ni Tallow ngan didto hiya ginsikmit. Tubtub yana diri pa hiya ginlulutaw han militar.

Ha Cavite, ginsalawdan han hinimu-himo nga kaso han 2nd CMO Bat-talion hira Jojo Mercado, Miriam Villanueva ngan iba pa nga residente han Purok 5, Barangay Langkaan 1, Dasmariñas tungod ha pagtabrog nira ha mga sundalo ha komunidad. Kasumpay ini han pagdiri nira nga magbaligya an ira tindahan ha mga elemento han batalyon.

Panmomba. Ginsamok han magbakod nga bomba, kanyon, ngan pa-ngistraping han mga yunit han AFP an kamingawan ngan oras han pama-huway han mga residente han Tapaz, Capiz hadton alas-2:30 han kaaga-hon han Agosto 22. Nagdurot ini hin grabe nga kasamok ngan nagduso ha pira nga pamilya nga mag-ebakwet tikang ha ira komunidad.

Paniniktik. Ginkaestorya ngan gintiktikan han usa nga pulis an mga membro han Pamalakaya-Navotas hadton urhi nga semana han Agosto. Nag-aro hin impormasyon an ahente nga pulis, nga nagpakilala nga taga-Bureau of Fisheries and Aquatic Resources, ngan nagtanyag hin kwarta ka-balyo han impormasyon hiunong ha grupo. Agud ibuksas an paniniktik, gin-kompronta han grupo an pulis hadton Agosto 31 ha usa nga restawran. AB

Tikang ha paypay 5

KM, dekada 1970 ha panahon han balaud militar ni Marcos Sr, ngan pag-a-bot ngan paggios han hukbo han katawhan ha baryo hasta ha presente.

Antes an aktibidad, iginhimo an serye han mga miting-konsultasyon han Partido, yunit han BHB ngan responsable nga lider masa ha baryo. Naghimo han komprehensibo nga plano basar ha kabug-usan nga plano han komite ha prente ngan seksyon komite ngan ha aktwal nga gios han kaaway. Ha sakob han usa kasemana, nahitalaan an mga buruhaton ngan rekisitos ha pagpapa-tuman han plano sugad han sumada, imbestigasyon ngan pabubug-os han plano. Iginhimo an patikang nga miting agud hisgutan an mga borador ngan adman an igin-andam nga mga dokumento. Ginhimo nga kampanya an pag-uurusa ha bug-os nga organisado nga masa hini nga mga dokumento kadu-ngan an kampanya ha pag-aaram han Rebolusyon. Ginhimo liwat nga kam-panya an pagrebyu ha rebolusyunaryo nga giya ha reporma nga agraryo, nga usa ha batakan nga dokumento han PKP.

Ikaduha nga parte: Kagiusan pagtutul-id ngan an pagtutukod han asosasyon masa. AB



Tanggalay ha Wyeth, gintipahan. Gin-sukna han Wyeth Philippines Progres-sive Workers Union (WPPWU-DFA-KMU) an iskema nga "cluster crew" nga plano nga ipatuman han kompaniya ha pabrika. Sigon ha unyon, pamaagi ini han pleksibilisasyon nga magdudugang han trabaho ha trabahador, pagbalhin ha iba nga seksyon ha produksyon, ngan posible mahingadto ha tanggalay.

Linutaw an plano nga pagpapatuman han "cluster crew" ha panahon nga nag-hihimo han negosasyon an mga tinagla-was han WPPWU ngan pamunuan han Wyeth para ha bag-o nga CBA nga ginti-kangan hadton Hunyo. Iginpapasulong han unyon ha negosasyon an ₱15,000 dugang nga suhol ha sakob han tulo ka-tuig, dugang nga mga benepisyo, ngan regularisasyon ha mga kontrakwal.

Ika-100 kaadlaw han welga ha Kawa-saki, ginhinumdom. Nagtirok an mga trabahador han Kawasaki United Labor Union (KULU) hadton Agosto 29 para hinumdoman an ika-100 kaadlaw han ira welga nga gintikangan hadton Mayo tu-ngod ha *deadlock* ha negosasyon ha CBA. Nagprograma hira ha atubangan han Kawasaki Motors Phils Corporation (KMPC) ha Muntinlupa City. Nakig-usa ha programa an Kilusang Mayo Uno ngan mga unyon hini.

Trabahador nga gintanggal ha Nexpe-ria, nahibalik. Kataliwan han pira kabu-lan nga pag-iinsister ngan pagsalawad han kaso ha Dole, nahidaug hadton Agosto 18 han Nexperia Philippines Inc Workers Union (NPIWU-NAFLU-KMU) an pagpapabalik ha trabaho han duha nga trabahador ngan lider han un-yon nga iligal nga gintanggal han kapita-lista. Sigon ha desisyon, kinahanglan mahibalik an duha ha ira daan nga posi-syon, igpabilin an ira *seniority rights*, ngan baydan an tanan nga waray nira makarawat nga suhol ngan benepisyo ti-kang Marso 10 tubtub ha ira pagbalik ha trabaho. Gintanggal an duha, kaupod an duha pa nga upisyal han unyon, hadton Disyembre 2024 ha akusasyon nga "pag-ulang" ha sulod-gawas han mga produk-to ha kompaniya.

Pagpasulong han patriyotiko ngan demokratiko nga pakigbisog han kabatan-unan nga Pilipino

Katin an mga plakard, bandera, ngan *megaphone*, pursigido nga iginpapasulong han kabatan-unan nga Pilipino an ira patriyotiko ngan demokratiko nga pakigbisog atubangan han ginpagrabe nga atake han rehimen Marcos ngan National Task Force-Elcac kontra ha ira. Diri hira nagpapamingaw, ngan nadiri nga magin mahuyo ngan yumukbo ha pasista nga dikta han estado.

Ha naglabay nga mga semana, magkalain-lain nga aktibidad an ginpangunahan ngan ginpartisiparan han kabatan-unan para ibuksas ngan suknaon an kontra-katawhan nga mga palisiya han rehimen Marcos. Ha sakob ngan gawas han mga eskoylahan, nagpapartisipar hira ha mga pakigbisog han katawhan.

Paggios ha mga unibersidad

Gatus-gatos nga kabatan-unan-estudyante an nagpartisipar ha mga demonstrasyon ngan aktibidad ha pribado ngan pampubliko nga unibersidad agud tapuon an pag-abre han klase ha naglabay nga bulan. Iginpalandaw nira ha mga paggios an isyu han edukasyon, pag-uundong han ira demokrati-ko nga katungod, ngan pag-ato ha pagpupoy ha akademiko nga kalibrihan.

Masobra 1,300 kabatan-unan an nagprotesta ha Polytechnic University of the Philippines (PUP) ha Sta. Mesa hadton Septyembre 2 agud tikangan an bag-o nga akademiko nga tuig. Ha University of the Philippines (UP)-Los Baños, inabot ha 500 an gumios nga mga estudyante hadton Agosto 12. Gatus-gatos liwat an nagpartisipar ha mga rali ha iba pa nga kampus han UP tikang Baguio ngadto Diliman, tubtub Visayas ngan Mindanao.

Iginlansar liwat an mga paggios ha Technological University of the Philippines-Manila, Cavite State University, Southern Luzon State University ha Quezon, ha Bicol University, ngan Western Visayas State University ha Iloilo.

Kataliwan an pira nga tuig, utro liwat nga nakagtirok hadton Agosto 30 ha Tabuk City an Samahan ng mga Mag-aaral sa Kalinga, usa nga organisasyon ha Kalinga State University

(KSU). An grupo hadto ginkilala han unibersidad kundi nahunong han igred-tag, ha sulsol han NTF-Elcac ngan AFP hadton 2021.

Ha mga pribado nga eskoylahan, naglansar han paggios an mga kabatan-unan ha Saint Louis University ha Baguio City, ha Adamson University, Ateneo de Manila University, ngan De La Salle University ngan iba pa nga unibersidad. Waray hira magpabantad ha pandarahug han administrasyon, hulga han suspensyon ngan iba pa nga pitald panpenalidad.

Gawas ha kampus

Diri nagpapalimitar an kabatan-unan ha mga isyu ha sakob han kampus. Militante hira nga nagmamartsa ha mga kalsada kaupod an mga trabahador ngan kabras ha syudad, ngan napakadto han kabaryuhan agud makig-usa ha masa nga parag-uma ngan nasyunal nga minoriya.

Kausa yana an mga kabatan-unan ha pagsukna han katawhan ha maanomaliya ngan putos hin korapsyon nga mga proyekto nga *flood control* ngan mga imprastraktura. Ginkadto nira ngan ginbalong han lagay ngan dunot nga utanon an upisina han mga kontratista ngan han Department of Public Works and Highways ngan nananawagan han baratuon ha rehimen Marcos.

Nakighan-ay hira ha pakigbisog kontra ha demolisyon han mga residente han Smokey Mountain ngan Malara ha Tondo. Padayon hira nga nasuporta ha pakigbisog han mga trabahador ngan unyon han Nexperia, welga ha Kawasaki, ngan kumadto ha mga piketlayn.

Gin-uungbawan nira an kahadlok ngan ngirhat nga iginsasabrag han militar ha kabaryuhan ha pagpartisipar ha mga *fact-finding mission* ha Mindoro ngan Quezon. Gin-gagamit nira an social media agud ibuksas ha publiko an tikadamo nga mga kaso han pagtalapas ha tawhanon nga katungod ha kabaryuhan.

Bisan an mga kabatan-unan nga Pilipino ha langyaw nga labnasan nauli ha Pilipinas agud magpartisipar ha pakigbisog han katawhan. Ha naglabay nga mga bulan, grupo-grupo nga kabatan-unan tikang ha US an binisita ha Pilipinas agud mahibaro ha pakigbisog han mga sektor.

Diri ginpipinsar han kabatan-unan an gasgas na nga larang han NTF-Elcac nga pagbabansag ha mga aktibidad han sektor komo "terror grooming." Maisugon nga ginkakatinan yana han kabatan-unan nga Pilipino an mahugot nga buruhaton han pagpupukaw, pag-oorganisa ngan pagpapagios ha masa nga anakbalhas. Ginpapanday nira an kalugaringon ngan ginsusugbong an sakripisyo komo mga sumurunod han pakigbisog han katawhan Pilipino. AB



Pagbabase han tropa nga Australian ha Pilipinas, estratehiya han US

Hini nga naglabay nga mga bulan, susrunod an mga *war games* nga iginlalan-sar han Australia ha Pilipinas. Nasubay ini ha estratehiko nga plano han pag-dependensa han hegemoniya han US ha Asia-Pacific, kun diin dako an bentaha han Australia.

Usa ha mga *war games* an Alon 2025, nga ginhimo ha tuna ngan kagatan han Palawan, Mindoro ngan iba pa nga parte han Luzon. Hini nga mga *war games*, nagpadara an Australia han pinakadako nga ihap han mga sundalo ha Southeast Asia tikang han manginlabot ini ha East Timor hadton 1999. Antes hini, iginlansar han Australia an Kasangga 2025, usa nga pagpapahiara ha kontra-insurhensiya ha Camp Kibaritan ha Bukidon.

Diri pala maiha, iginduso na liwat han Australia an pagtitindog han kalugaringon hini nga mga base ha Pilipinas agud igbalay an natikadako nga ihap han tropa ngan ira mga higamit ha nasud. Hadton Agosto 22, ginpir-

mahan han mga upisyal ha depensa han Austraila ngan Pilipinas an State-ment of Intent for Enhanced Defense Cooperation agud ihagudalan an katuyuanan hini. Nakatalaan nga igpinal an kasarabutan ha 2026.

Ginhahagudalan hini nga kasara-butan an pirmihan nga pagpwesto han mga tropa han Australia ha Pilipinas, paglalansar han dagko nga *war games* ngan pamumuhunan ha "imprastrak-tura nga pandepensa" o mga base mi-litar. Ini nga kasarabutan magigin ka-pareho ha Enhanced Defense Coope-ration Agreement (EDCA) giutan han Pilipinas ngan US, nga nagtatamak ha soberaniya han nasud ngan maghihi-got ha nasud ha armado nga banggaay

nga ginpapaypayan han US. Dugang an mga tropa, sarakyan ngan higamit pangerra han Australia ha higante na nga panmilitar nga ma-kinarya han US nga nakalatang ha Pili-pinas.

Samtang, usa na liwat nga base nabal an gin-abrihan han AFP, ha di-reksyon han US, ha Mahatao, Batanes hadin Septyembre. Kaparte an base han pukot han mga *forward operation base* nga iginlalatang han US ha mga isla han Batanes (may usa pa ha isla han) Mavulis tungod ha kahiranihan hini ha Taiwan.

Ha kasumpay nga balita, nabuk-sas an pag-aabre han rehimen Marcos ha Camp Cape Bojeador ha Burgos, Ilocos Norte agud magin imbakan han bala han US. Ini nga urhi nga mga pi-tad dugang nga nagdadanas ha Pilipi-nas ha ginpapapintas nga banggaay han US kontra ha China.

AB

Plano nga pagmimina ha Nueva Vizcaya ngan Benguet, gintipahan han katawhan

GINKUNDENAR HAN KATAWHAN han Dupax Del Norte, Nueva Visycaya an plano nga pagmimina ha ira komunidad. Hadton Agosto 4, gintagan han Mines and Geosciences Bureau an Woggle Corporation, kompaniya nga nakabase ha United King-dom, han exploration permit agud adman an mineral nga maku-kuha ha bungto. Plano nga sakupon han kompaniya an 3,102 kaektarya nga katunaan han lima nga barangay o 10% han ka-bug-usan nga katunaan han nasering nga bungto.

Layon naman nagpagawas han resolusyon an Barangay Oyao kontra ha pagmimina ngan an konseho han bungto, nga nagma-mando para ha kanselasyon han nahitatabo nga *mining explora-tion* ha bungto. Nagpahayag han pagkundenar an Diocese han Ba-yombong. Naglansar han *signature campaign* an mga residente.

Samtang, nananawagan an komunidad han Barangay Bula-lacao, Mankayan, Benguet para ha pagkansela ha permit han Crescent Mining Development Corporation (CMDC) para ha Mi-neral Production Sharing Agreement nga utro nga iginhatag ha kompaniya ha luyo han kawaray hini hin *free, prior and informed consent* tikang ha mga minoriya ngan *certification of preconditi-on*, nga igintalaan han reaksyunaryo nga balaud.

Aada ha 534 kaektarya nga parte han anestral nga katu-naan an lugop han proyekto ngan iginhatag liwat ha kompani-ya an dugang nga 300 kaektarya ha pareho nga lugar. Hulga an operasyon ha masobra 600 nga pamilya nga naglalaum ha pag-tatanum ha anestral nga katunaan. Pananag-iya han CMDC an Asean Copper, nga 40% hini pananag-iya han usa nga kompani-ya nga Australian.

Pagsaludar ngan paghinumdom ha mga Martir han Agosto han Panay

HA OKASYON HAN syahan katuig nga aniber-saryo han mga Martir han Agosto han Panay, naglingi ha ira kinabuhi an Komite ha Rehiyon han Partido Komunista ng Pilipinas ha Panay. Naglansar han magkalain-lain nga aktibidad an rebolusyunaryo nga kagiusan ha bug-os nga Agosto, ngan partikular nga ginhandum an Agosto 26 Adlaw han mga Martir han Panay.

An mga Martir han Agosto han Panay gin-kakaapihan han 11 nga Pula nga mangaraway han Bagong Hukbong Bayan (BHB)-Panay (Coronacion Waling-Waling Chiva Command) ngan mga lider ngan kadre han Partido nga namartir hadton Agosto 2024.

Haros usa katuig an nakataliwan, iginre-port han National Democratic Front (NDF)-Panay nga 10 ha mga namartir nadakop, gin-tortur ngan tuyo nga ginpatay han militar, butaray nga pagtalapas ha internasyunal nga makatawo nga balaud.

Komo pagsaludar ha ngatan nga martir han isla, naglansar han mamingaw nga 21-*gun salute* an mga yunit han BHB-Panay. Nagtirok liwat an Kabataang Makabayan-Pa-nay, Katipunan ng mga Samahang Manggaga-wa-Panay ngan iba pa nga rebolusyunaryo nga organisasyon masa agud magpasidungog.

40%

la han **badyet para ha konstruksyon** han imprastruktura an nahingangadto ha proyekto, an mas dako nga parte iginbubursa han mga burukrata kapitalista (tikang Malacañang tubtub lokal nga gubyerno) ngan mga nawotawo nira nga kontraktor.

7

nga bokis-de-gerra an igintutok han US ha kadagatan han **Venezuela** agud tarhugon han pangatake an rehimen Maduro, gamit an hinimu-himo nga akusasyon nga dabi an nasud ha iligal nga negosyo han narkotiko (iligal nga droga).




50

nga barko ilarum han **Global Sumud Flotilla** an nagpalawod tipakadto ha Gaza yana nga Septyembre ha tuyo nga magdul-ong han pagkaon ngan iba pa nga panginahanglan han katawhan ha Gaza nga biktima han henosidyo ngan pagpapagutom han Israel. Ginpartisiparan an *flotilla* han katawhan tikang ha 44 nga nasud, kaupod an Pilipinas.

Alipato at Muog

pelikula hiunong ha pagsikmit ngan pagpawara han AFP ha aktibista nga hi **Jonas Burgos** nga nagdaug nga Best Picture ha nakalabay nga Famas Awards. Nagdaug liwat nga Best Director para hini an bugto ni Jonas nga hi JL Burgos.



121 kamilimetro

an uran nga iginbuhos ha sakob la han usa kaoras ha **Quezon City** hadton Agosto 30, 2025 nga hinungdan han grabe nga pagbaha bisan ha mga lugar nga hadto diri ginbabaha.



40+

an marahalon nga sarakyan nga igindasig han mga **Discaya**, pamilya nga may 9 nga kompaniya nga dabi ha pangungurakot han pondo ha mga proyekto nga **flood control**.

500

nga **báta** nga babaye an kada adlaw nanganganak ha nasud. Masobra katunga han nagbuburod bunga han panlugos han mga amay, batâ o lalaki nga kaurupdan.

Ginkuhaan: *Philippine Commission on Population*

4,567

kaektarya nga kagugub-an an hihibangon han **Banahaw Wind Power Project** han GigaWind4 Inc, usa nga subsidyaryo han ACEN Corporation han Ayala Group, ha bawnderi han Sariaya, Quezon ngan 10 nga barangay han Tayabas City.

Ginkuhaan: *Save Bundok Banahaw Network*

Ikaduha nga parte:

Ekspansyon han komersyal nga plantasyon, hulga ha natural nga karikuhan han nasud

Hul-os nga ginhinambog ni Ferdinand Marcos Jr nga an krisis ha klima an usa ha nangunguna nga ginbabaton han iya rehimen. Ha paglilirong nga makakalibungan hiya, kun anu-ano nga buwa nga proyekto nga reporestasyon an iginpatuman han rehimen ha ilarum han Department of Environment and Natural Resources (DENR). Kalakip hini nga mga proyekto an Expanded National Greening Program, "PagbaBAGo: A Million Learners and Trees," Green Samar Reforestation Project, ngan an "Forests for Life: 5M Trees by 2028," nga iginlansar hadton Marso 21. An ungod, an tinuod nga katuyuanan han mga proyekto nga reporestasyon amo an abrihan an nasasalin nga kagugub-an ngan prontera para ha "ligal" nga pagsakob han tinagdagko nga langyaw nga negosyo agud luputon ngan himuon nga plantasyon an higluag nga kagugub-an.

Hiluagan nga ginhihibang an kagugub-an agud ig-andam an katunaan ha plantasyon han mga kahoy. *Falcata* ngan kawayan an kaagsuban nga igin-tatanum ha mga plantasyon tungod kay madagmit ini tumubo. Bisan kun an *falcata* ngan kawayan natural nga matatad-an ha Pilipinas, an pagtatanum hini ha diri hini natural nga gintutubuan nagdudurot han pagkahibang ha saribuhay ngan ekolohiya han usa nga lugar. Damo nga tanaman, hayop ngan insekto an napapalayas ngan namamatay tungod ha pagtitindog han mga plantasyon. Nagluluya liwat an kalidad han tuna, hinungdan nga masayon an katimpag hini. Nahuhubas an mga burabod ngan sapa, ngan tungod kay tinagdamo ngan "dayo" an kahoy nga igitatanum, gin-aagawan hini han karikuhan nga mineral an iba pa nga tanaman ngan kahoy ha lugar.

Paghiluag han plantasyon han mga kahoy

Hadton 2021, gin-aghat han DENR an pagtitindog han plantasyon han kawayan agud pauswagon an industriya hini ha nasud. Gintagan han Southern Philippines Development Authority an EcoPlanet Bamboo, usa nga kompaniya nga Amerikano, han inisyal nga 8,369 kaektarya agud tanuman han mga kawayan nga pan-eksport ha Lanao del Sur. Aada ha 30,000 kaektarya an plantasyon han kawayan ha Pangasinan han kompaniya nga CS First Green-Agri-Industrial Corp. Plano naman nga pahiluagon han kompaniya nga Kilambay Plantation Corp an ira plantasyon tubtub 25,000 kaektarya ha Mindanao, samtang mayda na ini 3,000 kaektarya nga plantasyon ha Carmen, Cotabato. Target liwat han Department of Agriculture nga mapahiluag tubtub 42,000 kaektarya an mga plantasyon han kawayan ha tuig 2030.

Samtang, an *falcata* an pinakadamo nga gineeksport nga kahoy han nasud, mayoriya ha nasud nga China,

Japan ngan US. Nangunguna nga gin-gagamit ini ha paghimo han papel, *plywood*, *pulpwood*, *veneer* ngan mga muwebles (*furniture*). Paborable para ha mga eksporter an *falcata* tungod kay madagmit ini nga dumako. Poyde na ini anihon kataliwan han 3-10 ka-tuig, depende ha karuyag nga kalidad han kahoy. Ha Davao Oriental an pinakadako hini nga plantasyon nga may kahiluagon nga 1,200 kaektarya. Pina-kadamo nga plantasyon naman an ha parte han CARAGA nga aada ha kabug-usan nga 20,404 kaektarya. Hadton Hulyo, igin-anunsyo an plano nga buligay han Misamis University ngan DENR para ha pagtitindog han tulo kaektarya nga plantasyon han *falcata* ha Barangay Capucan, Ozamis City. Ha plantasyon, plano nga magtanum han 2,400 nga higtaas nga kalidad han *falcata* ngan magpadamo han saring-sing hini para ha mga tanuman ngan plantasyon ha Region 10 ngan iba pa nga prubinsya ha Mindanao. Nabalor han masobra ₱12,000 an aada ha 10 anyos nga kahoy han *falcata*.

Ha tahub han "reporestasyon," gin-uuwat han rehimen Marcos an katawhan nga an mga komersyal nga plantasyon sugad han kawayan makakalibungan ngan baton ha krisis ha klima han nasud. Kundi an mismo nga pagtitindog han plantasyon, imbes nga buhion ngan parabungon an natural nga ekolohiya han kagugub-an, an nagwawakay ha kalibungan. Ura-ura kadako nga ganansya, diri preserbasyon ha kalibungan, an tinuod nga larang han mga plantasyon hini nga kahoy.

Gamit ni Marcos an pwera nga militar ngan pulis agud pagerbihon nga gwardiya ngan tagdependa han mga kapitalista. Diri na maihap nga minoriya ngan parag-uma an ginpala-yas, ginluputan han tuna, gin-gipit, ginsikmit, ginsaladwan han hinimu-himo nga kaso, ngan ginpatay han mga berdugo para ha interes ngan higante nga kita han mga kapitalista.



Pakuri ngan pasista nga rehimen Prabowo-Gibran han Indonesia, gintapo han protesta

Utro nga binuto hadton Agosto an protesta han katawhan Indonesian kontra ha mga kontra-katawhan nga palisiya han presidente ha nasud nga hi Prabowo Subianto ngan bise presidente niya nga hi Gibran Rakabuming Raka. Naggrabe an ira kangalas kahuman ligison han sarakyan han pulis ngan napatay hi Affan Kurniawan, usa nga *delivery rider*, hadton Agosto 28. Tikang ha syudad han Jakarta, sinamwak an mga protesta ha 32 nga prubinsya ngan ha mga syudad han Bandung, Surabaya, Malang, Solo, Yogyakarta, Medan, ngan Makassar.

Ha urhi nga mga protesta, iginpa-kita han katawhan an kagrabihon han ira kangalas ha pagsusunog han mga pampubliko nga mga bilding, pasilidad ngan sarakyan, ngan pagsulod ha mga balay han mga korap nga upisyal ngan pulitiko. Ginpuyopoy han rehimen Prabowo-Gibran an mga protesta gamit an *tear gas*, *water cannon* ngan *rubber bullet*. Iginpailarum han rehimen ha бага-balaud militar an mga kalsada ngan komunidad ngan ginmanduan an pulis nga mangaresto ngan manmusil han mga raliyista.

Inabot ha 10 an ginpatay han mga pwersa han estado tikang Agosto 25 tubtub Septyembre 2, samtang 1,241 an ginaresto (kaupod an mga igindeklara nga nawawara) ngan 800 an grabe nga nasamaran.

Mitsa han protesta an kangalas ha paghahatag han rehimen han binulan nga alawans para ha pabalay han mga membro han parlamento, nga 20 kabeses nga mas madako tanding ha minimum nga suhol han mga trabahador. Gawas pa ini ha ira sweldo nga aada ha 100 milyon rupiah o ₱350,000/bulan. Kadungan hini, ginibanan ni Prabowo an badyet para ha mga rehiyon, nga nagduso ha mga lokal nga gubyrno nga mag-imponer han dugang nga buhis nga tubtub 250%.

Duro nga ginkakangalsan han mga Indonesian an rehimen, ha luyo han kunuhay "popularidad" hini han maeleher ha posisyon. Ha syahan nga tuig ha poder, ginkalibangan ni Prabowo an pagpabuy-ay han iya gabinete ngan mga upisyal ha parlamento. Ginpahiluag niya

an poder han militar ngan pulis agud konsolidahon an iya kontrol ha estado. Ginkalibangan niya an pagkonso-lida han kawat ngan benepisyo pinaagi han pagtukod han BPI Danantara (National Sovereign Wealth Fund).

Maiha na nga nakaladkad an kangalas han mga Indonesian ha kawaray-pulos han estado nga batunon an krisis ha pakabuhian ngan ekonomiya. Naghihitaas an presyo han mga paplitan ngan serbisyo, gastos ha edukasyon ngan kalibsugan. Daramo an waray trabaho ngan hiluagan an kawaray kaseguruhan ha trabaho. Hirayo nga diri nakasasadang ha panginahanglan han usa nga pamilya an minimum nga suhol.

Gawas ha nasyunal nga kapitol-yo, mapintas an paniniyupi ha pagtrabaho, panlulupot han tuna han mga langyaw nga korporasyon, hiluagan nga pagpapalayas ha mga paraguma ngan minoriya, pagkahibang han kalibungan ngan kriminalisasyon ha pagtipa ha garboso nga mga proyekto nga pan-imprastraktura, mina ngan plantasyon nga gintikangan han nahiuana nga rehimen Widodo ngan iginpapadayon ni Prabowo.

Ha bungto han Pati ha Central Java, nagprotesta hadton syahan nga semana han Agosto an 100,000 katawo agud isalikway ini nga dugang nga buhis ngan igin-insister an pagpapatalsik han rehente (meyor) ha poder ngan pagpapabasura ha iba pa niya nga kontra-katawhan nga palisiya. Hadton Hulyo, nagprotesta liwat an gudti nga negosyante, mga trabahador ngan kablas nga ginpalayas agud ihagudalan an 1,175 kaektarya nga Mandalika Special Economic Zone, usa nga megaturismo nga proyekto. Hito liwat nga bulan, nagwelga an mga trabahador ha PT Huadi Nickel Alloy Indonesia kontra ha hiluagan nga tanggalay ngan pwersahay nga pagpa-absent ha trabaho hin waray negosasyon.

Nakakuha han suporta an mga protesta ha Indonesia tikang ha katawhan ha mga kaamyaw nga nasud hini ha Asia nga nag-aantos han kapareho nga krisis ha pakabuhian ngan naatubang ha kapareho nga pandarahug ngan pasismo.

Nagpadangat liwat hin pakig-usa an Partido Komunista ng Pilipinas ha mga protesta nga sering hini nagpapalandaw ha grabe nga karuyagon han katawhan Indonesian para ha rebolusyunaryo nga pagbabag-o. Kaupod an masa nga anakbalhas nga Indonesian, ginsusugbong han mga Pilipino nga anakbalhas an bug-at han diri pantay nga sistema ha ekonomiya, nga ginpagrabe han pankalibutan nga krisis han kapitalismo, samtang padayon nga napatakas an mga reaksyunaryo nga klase ngan pulitiko.

Matambok an kundi-syon ha Indonesia para ha mapintas nga makaklase nga pakigbisog, diri la pinaagi han mga panmasa nga protesta, kundi labaw nga importante, pinaagi han armado nga pag-ato ngan gerra han katawhan, sigon ha PKP.

